

**SEGAN BINTIK MAS**  
Gould's Frogmouth

FAMILI: Batrachostomidae  
NAMA SAINTIFIK: *Batrachostomus stellatus*

**CIRI-CIRI**

Individu dewasa mempunyai saiz yang agak besar dengan bulu pahat yang mempunyai hujung putih pada atas sayap dan skapular. Ia mempunyai kolar berwarna kehitaman dan tekak serta dada coklat seragam dengan tanda-tanda putih. Mata pula berwarna coklat. Individu betina mempunyai warna yang lebih pudar. Individu juvenil lebih pudar, tanpa kolar atau tompok pada bahagian atas badan, skapular dan bulu pahat pada sayap. Panjang keseluruhan bagi individu dewasa ialah 23.0-26.5 sm.

**MAKANAN**

Dietnya terdiri daripada riang-riang, belalang, rama-rama, kupu-kupu kumbang, semut, anai-anai, serangga-serangga lain dan ulat beluncas.

**HABITAT**

Habitat yang sesuai bagi spesies ini ialah di hutan dipterokarp sehingga ke ketinggian 185 m dari aras laut.

**BUNYI**

Individu jantan mengeluarkan bunyi siulan *woah-weeo* yang menyeramkan, agak lemah dengan nota kedua yang bernada rendah bagi penandaan kawasan. Kadang kala, ia mengeluarkan bunyi *weeo*. Individu betina pula mengeluarkan siri nota *wow* yang cepat dan nyaring, tiga hingga lima nota *wek* yang bernada lebih tinggi dan siulan *weeeoh*.

**PEMBIAKAN**

Musim pembiakan bagi spesies ini adalah di antara bulan Februari hingga Ogos. Individu betina boleh menghasilkan 1-2 biji telur berwarna putih. Sarangnya kecil, dibina pada dahan yang melintang, 1.5-10.0 m dari aras tanah.

**STATUS**

Akta 76/72, dilindungi sepenuhnya.